

Isumaginninnermi suliaasaqarfimmi nakkutilliisarneq pillugu Namminersorlutik Oqartussat nalunaarutaat

Isumaginnittoqarfiup aqunneqarnera aqqissuussaanelu pillugit Inatsisartut peqqussutaat nr. 11, 12. november 2001-imeersumi § 1, imm. 2, Meeqqat tapersersorneqarnissaannut Inatsisartut inatsisaat nr. 20, 26. juni 2017-imeersumi § 8, imm. 6, § 11, imm. 5 aamma § 37, imm. 7, Inuit innarluutillit tapersersorneqarnissaannut Inatsisartut inatsisaat nr. 13, 12. juni 2019-imeersumi § 62, imm. 4, § 63, imm. 4, § 64, imm. 6, aamma § 68, imm. 4, aamma Utoqqarnik paaqqinniffiit il.il. pillugit Inatsisartut peqqussutaat nr. 11 ulloq 30. oktober 1998-imeersumi § 5, imm. 4 malillugit tullinnguuttut makku aalajangersarneqarput:

Kapitali 1

Kommunalbestyrelsip ingerlatsineranik pingaarnertut nakkutilliineq

§ 1. Naalakkersuisut qitiusumik nakkutilliinermik ingerlatsivia (Nakkutilliinermik ingerlatsivik) kommunalbestyrelsip ingerlatsineranik aamma inunnik isumaginninnermut inatsisinik aqutsineranik, matumani Meeqqat tapersersorneqarnissaannut Inatsisartut inatsisaannik, Inuit innarluutillit tapersersorneqarnissaannut Inatsisartut inatsisaannik, Utoqqarnik paaqqinniffiit il.il. pillugit Inatsisartut peqqussutaannik kiisalu pisortat ingerlatsineranni suliat suliarineqartarnerat pillugu inatsimmi aamma pisortat ingerlatsinerat pillugu inatsimmi malittarisassanik pingaarnertut nakkutilliisuusaaq.

§ 2. § 1 malillugu pingaarnertut nakkutilliinermi pineqassapput:

- 1) § 3 malillugu inatsisit,
- 2) § 4 malillugu aningaasaqarneq, aamma
- 3) § 3 malillugu isumaginninnermi suliaasat suliarineqarnerisa pitsaassusiat.

Imm. 2. Pingaarnertut nakkutilliineq makkuninnga imaqassaaq:

- 1) suliaasanik assigiinngiaartunik misissuineq,
- 2) inunnik ilisimaarinnittunik oqaloqateqarnerit, aamma
- 3) ingerlatsiviup aqqissuussaanelanik misissuineq.

§ 3. § 2-mi, imm. 1-imi, nr. 1 aamma 3 malillugit inatsisilerinnermut tunngasunik isumaginninnermilu suliaasanik nakkutilliinermut ilaassapput ingerlatsiviup:

- 1) maleruagassanik allassimasunik suleriaasiulersimasunillu malinninnera,
- 2) nassuiaasarnera missiliuisarneralu,
- 3) suliamut paasissutissiinera, suliamik suliarinnittarnera naammagittaalliutinillu suliaqarnera

- 4) piginnaasatigut tutsuiginassutsikkullu ajornartorsiutinik suliarineqarnera, aamma
- 5) imminut nakkutilliivigisarnera aamma aqutsinikkut nakkutilliinera.

§ 4. § 2, imm. 1, nr. 2 malillugu kommunip isumaginninnermik suliassa qarfimmi aningaasaqarnermik ingerlatsinera isumannaatsuunersoq inatsisinillu tunngaveqarnersoq aningaasaqarnermik nakkutilliinerup nalilissavaa.

§ 5. § 1 malillugu Nakkutilliinermik ingerlatsivik kommunini ataasiakkaani tamani minnerpaamik ukiumut ataasiarluni pingaarnertut nakkutilliinermik ingerlatsisassaaq.

Imm. 2. Nakkutilliinermik ingerlatsiviup nakkutilliinermiut atatillugu ukiut sisamakkaarlugit kommuninut qinigaaffiup iluani illoqarfiit tamaasa nakkutilliiartorfigisimassavaa.

Imm. 3. Nakkutilliinermik ingerlatsiviup nakkutilliinermiut atatillugu imm. 2-mi piffissap pineqartup iluani nammeneq naliliinini malillugu nunaqarfiit assigiinngitsut nakkutilliiartorfigisimassavai.

§ 6. § 1 malillugu pingaarnertut nakkutilliinissaq sapaatit akunneri 2 sioqqullugit kommunalbestyrelsimut kalerriutigineqassaaq.

Nakkutilliinermiut nalunaarusiaq

§ 7. § 1 malillugu Nakkutilliinermik ingerlatsivik pingaarnertut nakkutilliinermiut nalunaarusiamik suliaqartassaaq.

Imm. 2. §§ 3-mi aamma 4-mi pissutsit tulleriiarneqarsimasut misissuiffigineqarnerannik aamma isummerfigineqarnerannik nakkutilliinermiut nalunaarusiaq imaqassaaq.

§ 8. § 7 malillugu nakkutilliinermiut nalunaarusiaq, inaarutaasumik nakkutilliinermiut nalunaarusiap suliarineqannginnerani kommunalbestyrelsimullu nassiunneqannginnerani, minnerpaamik ulluni 14-ini kommunalbestyrelsimut tusarniutigineqassaaq.

Imm. 2. Nakkutilliinermiut nalunaarusiaq kingusinnerpaamik ullormi nakkutilliiffusimasumit qaammatit pingasut qaangiunnerisa kingorna naammassillugu suliarineqareersimassaaq.

Imm. 3. Immikkut ittumik pisoqartillugu imm. 1-imi aamma 2-mi piffissaliussat avaqqunneqarsinnaapput.

Imm. 4. Nakkutilliinermiut nalunaarusiaq Naalakkersuisut nittartagaatigut tamanut saqqummiunneqassaaq.

Imm. 5. Nakkutilliinermiut inaarutaasumik nalunaarusiap kommunalbestyrelsimut nassiunneqarneraniit qaammatit marluk qaangiunnerini, kommunalbestyrelse pissutsit nakkutilliinermiut nalunaarusiami uparuarneqartut iluarsiiffinialugit, kommunalbestyrelse qanoq iliorniarnini pillugu Nakkutilliinermik ingerlatsivimmit allakkatigut nalunaarusiussaaq.

Kapitali 2

Kommunini meeqqat nalinginnaasumik inummut sammititamik nakkutilliivigineqarnerat

§ 9. Meeqqat kommunimi atugaannik ingerlaavartumik nakkutilliinissaminut kommunalbestyrelse pisussaaffeqarpoq. Meeraq imaluunniit meeqqat eqimattat 18-it inorlugit ukiullit immikkut

ikiorserneqarnissaminnik pisariaqartitsisinnaasut, kommunalbestyrelsimit ilisimaneqalernissaat anguniarlugu, kommunalbestyrelse sapinngisamik siusissukkut nakkutiginnittassaaq.

Imm. 2. Kommunalbestyrelse imm. 1 malillugu nakkutilliineq naammassiniarlugu kommunip nunaqarfinut tamarmiusunut ukiut tamaasa nakkutilliinermik ingerlatsisassaaq.

Kapitali 3

Meeqqanik angerlarsimaffiup avataanut inissinneqarsimasunik inummut sammititamik nakkutilliineq

§ 10. Kommunalbestyrelse inissiisoq meeqqap inissinneqarsimasup inissinneqarfiani ukiumut marloriarluni inummut sammititamik nakkutilliisassaaq.

Imm. 2. Meeraq kommunimut allamut inissinneqarsimappat, kommunalbestyrelse inissiisuusoq kommunimilu inissiiffusumi kommunalbestyrelse, kommunalbestyrelse inissiisoq sinnerlugu inissiiffimmi kommunalbestyrelse nakkutilliinermik ingerlatsinissaa pillugu isumaqatigiissuteqarsinnaapput.

Imm. 3. Imm. 2 malillugu inummut sammititamik nakkutilliinissamik isumaqatigiissuteqartoqarsimappat, nalunaarummi matumani aalajangersakkat malillugit, nakkutilliisoqarnissaa kommunalbestyrelsip inissiisup akisussaaffigissavaa.

§ 11. § 10 malillugu inummut sammititamik nakkutilliineq, ima aaqqissuunneqassaaq, tassani meeqqamut iliuusissanut pilersaarut inissiiffusumut malinnaatinneqassalluni, aamma meeqqap pisariaqartitaanut tunngatillugu tapersiinerup naammannera tulluurtuuneralu ingerlaavartumik qulakkeerneqassalluni, makku ilanngullugit:

1) meeqqap inissinneqarfigisamini sumiginnarneqannginnissaa imaluunniit atonerlunneqannginnissaa, 2) meeqqap taassumalu angajoqqaavisa pisinnaatitaaffimminnik ilisimatinneqarnissaat, aamma 3) meeqqap peqataaffigisaanik naammagittaalliortoqarsimappat, naammagittaalliuutip inernera, meeqqamut, angajoqqaatut oqartussaasunut kiisalu meeqqap sullissisuanut tunniunneqarnissaa.

Imm. 2. Meeqqat tapersersorneqarnissaannut Inatsisartut inatsisaanni § 30-mi, imm. 2-mi nr. 2 malillugu meeraq ulloq unnuarlu paaqqinniffimmut inissinneqarsimappat, nakkutilliinerup aamma qulakkiissavai:

1) iliuusissanut pilersaarummi siunertarineqartut anguniagaasullu ulloq unnuarlu paaqqinniffup katsorsaanissamik pilersaarusiaani naammassineqassasut, 2) meeqqap inissinneqarsimasup pisariaqartitai ulloq unnuarlu paaqqinniffiup perorsaariaasiatigut ikorfartorneqassasut, 3) ulloq unnuarlu paaqqinniffimmiit killiffimmik nalunaarusiornikkut aamma katsorsaanissamik pilersaarusanik nutarterisarnikkut ingerlaavartumik alunaaruteqartoqartassasooq, aamma 4) pissaanermik atuisimanerit malitseqartinneqartassasut, pissaanermillu atuisimaneq pillugu nalunaarutit tunngavigalugit meeraq ulloq unnuarlu paaqqinniffimmi eqqortumik ikorfartorneqarnerisooq naliliiffigineqartassasooq.

§ 12. § 10 malillugu inummut sammititamik nakkutilliinermut atatillugu meeraq kommunalbestyrelsimit oqaloqatigineqartassaaq.

Imm. 2. Meeqqamik oqaloqateqarneq, apeqqutaatinagu meeraq ilaqutariinni paarsisartuni imaluunniit ulloq unnuarlu paaqqinniffimmi inissinneqarsimanersooq, inunnit inissiivimmeersunit najuuffigineqanngitsumik ajornanngippat ingerlanneqassaaq.

Imm. 3. Oqaloqatigiinnermi meeraq allanit illersoqqusinnaavoq. Tamanna pillugu kommunalbestyrelsip meeraq ilisimatissavaa. Meeqqap nammineq aalajangiisnaatitaanini malillugu ilagisinnaavaa:

- 1) meeqqanik illersuisoq isumaginninnermik ilisimasalik, imaluunniit
- 2) oqaloqatigiinnissamut inuk alla.

Imm. 4. Imm. 3-mi. nr. 2 malillugu meeraq oqaloqatigiinnissamut inummik ilaqarniarpat, meeqqallu mianerineqarnissanut tamanna naapertuutinnitsoq nalilerneqarpat, inuk pineqartoq kommunalbestyrelsimut oqarfigineqarsinnaavoq oqaloqatigiinnissamut peqataasinnaanngitsoq. Kommunalbestyrelse aalajangiippat inuk pineqartoq oqaloqatigiinnissamut peqataasinnaanngitsoq, oqaloqatigiinnissaq aallartitsinnagu meeqqanik illersuisoq isumaginninnermik ilisimasalik kommunalbestyrelsimut aggersarneqassaaq. Meeraq pillugu iliuusissanut pilersaarummi aalajangiineq allaganngorlugu kommunalbestyrelsimut tunngavilersorneqassaaq.

Imm. 5. Meeraq piginnaanikillismappat, piginnaanikillismanerullu kinguneranik oqaloqatigiinnissami ikiorneqarnissamik pisariaqartitsippat, meeqqap isumaata ilanngunneqarnissaa qulakkeerniarlugu tassunga kommunalbestyrelse immikkut ittumik isumaginnissaaq aamma tassunga atatillugu periaatsit atortorisarutillu immikkut ittut tassani atorsinnaallugit.

Imm. 6. Meeqqamik oqaloqatiginninneq immikkut ittumik pissuteqarluni pinngitsoortinneqarsinnaavoq, matumani meeqqap inerissimanera imaluunniit meeqqap mianerineqarnissaa pissutigalugu oqaloqatiginnissaaq naapertuutinnippat. Oqaloqatigiinnissap pinngitsoortinneqarnera meeraq pillugu iliuusissanut pilersaarummi allaganngorlugu tunngavilersorneqassaaq.

§ 13. § 10 malillugu kommunalbestyrelse inummut sammititamik nakkutilliinerminut atatillugu piffimmi inissiiffusumi pissutsinik ernumanartunik maluginiagap, meeraq imaluunniit meeqqat piffimmi inissiiffusumiittut pissutsinik ernumanartunik sunnerneqarsinnaappata, oqartussaqaarfimmut ingerlatsinermut sammititamik nakkutilliinissamik suliaqarnissaminut akisussaatitaasumut kiisalu kommunalbestyrelsinut inissiisimasunut, kommunalbestyrelse nalunaaruteqassaaq.

§ 14. Meeqqap ilorrisimaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat, kommunalbestyrelsip meeraq ingerlaannartumik peersissavaa uku pissutigalugit:

- 1) meeqqap naammanngitsumik isumassorneqarnera ajortumilluunniit pissusilersorfigineqarnera,
- 2) timikkut tarnikkulluunniit nakuuserfigineqarsimanera, paarinerlutaasimanera imaluunniit kinguaassiuutitigut atornerlunneqarsimanera,
- 3) meeqqami imaluunniit meeqqap qanigisaani atornerluinermik ajornartorsiuteqartoqarnera, pinerluttutut pissuseqartoqarnera imaluunniit allatigut inuuniarnikkut annertuunik ajornartorsiuteqartoqarnera, imaluunniit
- 4) meeraq pissusilersornermigut annertuumik ajornartorsiuteqarpat sungiussiniarnerminiluunniit ajornartorsiuteqarpat.

Kapitali 4

Ilaqutariinnik paarsisartunik ingerlatsinermut sammititamik nakkutilliineq

§ 15. Ilaqutariinnut paarsisartunut kommunalbestyrelsip akuersissummik tunniussiffigisimasaminut, kommunalbestyrelse ukiumut 1-luni ingerlatsinermut sammititamik nakkutilliisassaaq. Paarsisinnaanermut akuersissummut aamma ilaqutariittut paarsisartutut akuersissummut tunniunneqarsimasunut piumasaqaatit ilaqutariinnit paarsisartunit sulii naammassineqarsinnaanerit nakkutilliinerup qulakkiissavaa.

Imm. 2. Ilaqutariittut paarsisartutut akuersissut piumasaqaatitaqartumik tunniunneqarsimappat, piumasaqaatit eqqortinneqarnersut kommunalbestyrelsip nakkutilliinermini misissussavaa.

Imm. 3. Kommunalbestyrelsip ingerlatsinermut sammititamik nakkutilliinermini ilaqutariinni paarsisartuni pissutsit nakkutigalugillu ilaqutariit paarsisartut oqaloqatigissavai.

Imm. 4. Kommunalbestyrelsip ingerlatsinermut sammititamik nakkutilliinermini:

- 1) ilaqutariit paarsisartut nalunaaqqaarluni nakkutilliiartorfigisassavai,
- 2) ilaqutariit paarsisartut paasissutissanik naleqquttunik piniarfigisassavai, aamma
- 3) meeqqat ilaqutariinni paarsisartuni inissinneqarsimasut paasissutissanik naleqquttunik piniarfigisassavai.

Imm. 5. Imm. 4, nr. 1 malillugu kommunalbestyrelsip nalunaaqqaarluni nakkutilliiartortarnermi saniatigut ilaqutariit paarsisartut nalunaarfigeqqaarnagit aamma nakkutilliiartorfigisinnaavai.

§ 16. § 15 malillugu ingerlatsinermut sammititamik nakkutilliineq ima ingerlanneqassaaq, nakkutilliineq assigiiaartumik, ataqatigiissillugu aaqqissuussaasumik uppersaasorsorluakkamillu ilaqutariit paarsisartut aamma paarsinerminnut suliarinnittarnerat pillugu nalilersuinissamut tunngavissiissalluni.

Imm. 2. Inunnit suliamut tunngassuteqartut ataqatigiinnissaannik paasinnissinnaanissamut tunngavissaqartunit, tamannalu tunngavigalugu ilaqutariinnut paarsisartunut unammillernartitaannik ineriartornissamullu periarfissaannik taakkununga nalunaaruteqarsinnaasunit, nakkutilliineq ingerlanneqassaaq.

Imm. 3. Siusinnerusukkut nakkutilliinermit nalunaarusiaasimasuni oqaaseqaatit inassuteqaatillu aaqqissuussaasumik malitseqartinneqartarnissaat kommunalbestyrelsip nakkutilliinermut atatillugu qulakkiissavaa.

§ 17. § 15 malillugu ingerlatsinermut sammititamik kommunalbestyrelsip nakkutilliinissaanut paasissutissat pisariaqartinneqartut, qinnuigineqarneq malillugu ilaqutariinnit paarsisartunit kommunalbestyrelsimut tunniunneqassapput.

Imm. 2. Ilaqutariinnit paarsisartunit paasissutissanik kommunalbestyrelsimut ingerlatitseqqinneq, ingerlatitseqqinneq nakkutilliinissamut pisariaqartutut isigineqarpat, angajoqqaatut oqartussaassuseqartut akuersiteqqaarnagit pisinnaavoq.

§ 18. § 15 malillugu kommunalbestyrelse ingerlatsinermut sammititamik nakkutilliinerminut atatillugu ilaqutariinni paarsisartuni pissutsinik ernumanartunik maluginiagaqarpat, meeraq pissutsinik ernumanartunik sunnerneqarsinnaappat, kommunalbestyrelsimut inissiisimasumut kommunalbestyrelse nalunaaruteqassaaq.

§ 19. Meeqqap ilorrisimaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat, uku pissutigalugit kommunalbestyrelsip meeraq

ingerlaannartumik piissavaa:

- 1) meeqqap amigartumik isumassorneqarnera imaluunniit passunneqarnera,
- 2) timikkut tarnikkulluunniit nakuuserfigineqarsimanera, paarinerlunneqarnera imaluunniit kinguaassiuutitigut atornerlunneqarsimanera,
- 3) meeqqami imaluunniit meeqqap qanigisaani atornerluinermik ajornartorsiuteqartoqarnera, pinerluttutut pissuseqartoqarnera imaluunniit allatigut inuuniarnikkut annertuunik ajornartorsiuteqartoqarnera, imaluunniit
- 4) meeqqap allatigut pissusilersornermini naleqqussarnerminiluunniit ajornartorsiuteqarnera.

Imm. 2. Imm. 1 malillugu meeqqamik peersitsinerminut atatillugu, inoqutigiinni meeqqat allat arlaatigut iliuuseqarfingeqassanersut kommunalbestyrelsip nammineeeluni isummerfigissavaa, matumani meeqqat pineqartut ingerlaannartumik peerneqassanersut imaluunniit ilaqutariinni paarsisartuni najugaqartinneqaannassanersut ilanngullugit.

Imm. 3. Kommunalbestyrelsip ingerlatsinermut sammititamik nakkutilliisuusup aamma utaqqiisaa kommunalbestyrelse inissiisoq sinnerlugu meeqqamik peersitsisup, kommunalbestyrelse inissiisoq ingerlaannaq nalunaarfigissavaa. Matuma kingorna kommunalbestyrelse inissiisoq imm. 1 malillugu inaarutaasumik aalajangiissaaq.

§ 20. Ilaqutariit paarsisartut inoqutigiinniluunniit allat aanngajaarniutunik inerteqqutaasunik atuisuusut kommunalbestyrelsip pasitsaappagu, § 15 malillugu kommunalbestyrelse pissutissaqanngitsumik uninnganani ingerlatsinermut sammititamik nakkutilliartussaaq.

§ 21. § 15 malillugu ingerlatsinermut sammititamik nakkutilliinermut atatillugu kommunalbestyrelse aanngajaarniutunik inerteqqutaasunik atuisoqarneranik pasitsaassaqaruni inoqutigiinni ataaseq arlallilluunniit aanngajaarniutunik atuisuunersut paasiniarlugu misissorneqarnissaannik qinnuigisinnaavai.

Imm. 2. Imm. 1 malillugu aanngaajaarniutunik atuisuunermik misissuisoqartinnagu, inuk aanngaajaarniutunik atuisuunermut misissuiffingeqartussaq kommunalbestyrelsimit allaganngorlugu akuersisinneqassaaq. Akuersissuteqarneq pinngitsaaliissutaassanngilaq erseqqissuussallunilu.

Imm. 3. Imm. 2 malillugu inuup inoqutigiinniittup aanngajaarniutunik atuisuunermik misissorneqarnissamik akuersaarumangippat, § 23 malillugu kommunalbestyrelse annertusisamik nakkutilliinermit ingerlatsisinnaavoq, imaluunniit Ilaqutariit paarsisartut pillugit Namminersorlutik Oqartussat nalunaarutaanni § 8 malillugu ilaqutariinnut paarsisartunut akuersisummik utertitsisinnaavoq.

Imm. 4. § 15 malillugu ingerlatsinermut sammititamik nakkutilliinermut atatillugu imaluunniit allatigut pasitsaassisoqarpat, ilaqutariit paarsisartut arlaat imaluunniit inoqutigiinni alla aanngaajaarniutunik inerteqqusaasunik atuisuusoq, kommunalbestyrelse ilaqutaannik paarsisartunik ingerlatsinermut sammititamik nakkutilliisuusoq, § 15 malillugu ingerlaannaq kommunalbestyrelsimut inissiisimasumut nalunaaruteqassaaq. Matuma kingorna § 10 malillugu kommunalbestyrelse inissiisoq pissutissaqanngitsumik uninnganani inummut sammititamik nakkutilliinermit ingerlatsinissaminut pisussaaffeqarpoq.

§ 22. Ilaqutariit paarsisartut pillugit Namminersorlutik Oqartussat nalunaarutaanni § 5, imm. 2, nr. 10 malillugu kommunalbestyrelsip ilaqutariit peqqissussaannik naliliinerminut atatillugu, inoqutigiinni inuk

ataaseq imaluunniit amerlanerusut peqqissutsimut uppersaammik tunniusseqqullugit qinnuigisinnaavai. Peqqissutsimut uppersaamat qaammatit pingasut sinnerlugit pisoqaassuseqassanngilaq.

Annertusisamik nakkutilliineq

§ 23. Immikkut nassuiakkamik sakkortusisamik nakkutilliisoqarnissaa pisariaqartinneqarteq kommunalbestyrelsimit nalilernerqarpat, kommunalbestyrelse annertusisamik nakkutilliisoqarnissaanik aalajangiisinnavaq. Sivilissusissaa pissutsit ataasiakkaat aalajangersimasut suuneri tunngavigalugit aalajangersarneqartassaaq, taamaattorli piffissaq annerpaamik qaammatinik 3-nik sivilissuseqartukkuutaartinneqassalluni.

Imm. 2. Annertusisamik nakkutilliineq nalunaaqqaarluni nalunaaqqaaranilu ingerlanneqarsinnaavoq.

Imm. 3. Annertusisamik nakkutilliineq makkuninnga pissuteqarsinnaavoq:

- 1) ilaqutariit paarsisartut ajornartorsiutaat immikkut ittut nalinginnaasulluunniit misissoqqinneqarnissaat pisariaqarteq, nakkutilliinermiit nalunaarusiami inerniluunneqarpat,
- 2) ilaqutariit paarsisartut pillugit naammagittaalliortoqarpat,
- 3) meeraq paarineqarteq pillugu imaluunniit meeqqamut sunniisinnasunik pissutsinik ernumassuteqarnissamik ilimasulersitsisunik, nalinginnaasumik imaluunniit immikkut ittumik kommunalbestyrelse ilaqutariinni paarsisartuni maluginiagaqarpat, imaluunniit
- 4) paarsisinnanermut akuersissut malillugu ilaqutariittut paarsisartuunissamut imaluunniit paarsisinnanermut akuersissummut piumasaqaatit suli naammassineqarsinnaanerini ilaqutariinni paarsisartuni pissutsit aalajangersimasut pissutigalugit qularneq.

Imm. 4. Pissutsit annertusisamik nakkutilliinissamik eqqarsateqarnermut tunngaviusut pillugit ilaqutariit paarsisartut oqaloqatigineqareernerisigut, taamaallaat annertusisamik nakkutilliisoqarnissaanik aalajangiisoqarsinnaavoq. Pissutsilli immikkut ittut pisariaqartilerpassuk annertusisamik nakkutilliisoqarnissaa erngerluni aalajangerneqarsinnaavoq.

Imm. 5. Ilaqutariit paarsisartut pissutsinik aalajangiinermut tunngaviusunik aqqiisinnanerat aaqkeerusunnerallu ilimanaateqarsorineqarpat, annertusisamik nakkutilliisoqarnissaanik taamaallaat aalajangiisoqarsinnaavoq. Ilaqutariit paarsisartut pillugit Namminersorlutik Oqartussat nalunaarutaanni § 8 malillugu ilaqutariit paarsisartut pissutsinik ernumanartunik aqqiisinnanerat aaqkeerusunnerallu naatsorsuutigineqanngippat, ilaqutariinnut paarsisartunut akuersissutip utertinneqarnissaa kommunalbestyrelsip aalajangissavaa.

Imm. 6. Kommunalborgyrelse annertusisamik nakkutilliisoqarnissaanik aalajangiisimappat kommunalborgyrelsit inissiisuusut kommunalborgyrelsimit ilisimatinneqassapput.

Nakkutilliinermiit nalunaarusiaq

§ 24. § 15 aamma § 23 malillugit ingerlatsinermut sammititamik nakkutilliinerit tamaasa nakkutilliinermiit nalunaarusiamik kommunalborgyrelse suliaqartassaaq.

Imm. 2. Nakkutilliinermiit nalunaarusiami tulluittut ilisimasaat isumaallu kommunalborgyrelsimit ilanngunneqartassapput:

- 1) ilaqutariit paarsisartut, matumani nammineq meeraat angerlarsimaffimmi najugaqartut, inuillu allat

inoqutigiinni ilaasut ilanngullugit, aamma

2) meeraq paarineqartoq meeqqamullu paarineqartumut angajoqqaatut oqartussaasut.

Imm. 3. Nakkutilliinermi nalunaarusiami paasissutissat tulluuttut saqqummiunneqassapput:

1) Ulloq nakkutilliiffusoq.

2) Kina nakkutilliinermik ingerlatsisimanersoq.

3) Nakkutilliineq nalunaarutigeqqaarneqarsimanersoq imaluunniit nalunaarutigeqqarneqarsimannginneresoq.

4) Nakkutilliinermut tunngaviusoq.

5) Nakkutilliartortoqannginnerani kommunalbestyrelse paasissutissanik sunik piniarsimanersoq.

6) Nakkutilliinermi atavillugit kommunalbestyrelse kikkunnik oqaloqateqarsimanersoq.

7) Ilaqutariit meeqqanik qassinik paarisqaarnersut kiisalu meeqqat qassinik ukioqarnersut meeqqallu tapersorneqarnissamik pisariaqartitaat.

8) Nakkutilliinermi maluginiarneqartut suuneri.

9) § 21 malillugu aanngajaarniutinik atuisuunermik misissuisoqarsimappat, misissuinerup inerneru.

10) Ilaqutariit paarsisartut ilaqutariittut paarsisartutut akuersissummi piumasaqaatinik eqquutitsinerannik naliliineq.

11) Nakkutilliisoqarnerata malitsigisaanik qisuariartoqarsimappat qisuariaatit, matumani annertusisamik nakkutilliisoqarnissaanik aalajangiineq, ilaqutariittut paarsisartutut akuersissutit utertinneqarnissaanik aalajangiineq aamma paasissutissanik kommunalbestyrelsimut kommunalbestyrelsinulluunniit meeqqap ilaqutariinnut paarsisartunut inissinneqarnissaanik aalajangiisimasunut ingerlatitseqqissimaneq ilanngullugit.

Imm. 4. Nakkutilliinermi nalunaarusiaq ilaqutariinnut paarsisartunut ulluni 14-ini tusarniaanermut akissuteqarnissaannut piffissalerlugit tusarniaassutigineqassaaq. Inaarutaasumik nakkutilliinermi nalunaarusiap assilinera ilaqutariinnut paarsisartunut nassinneqassaaq.

Imm. 5. Immikkut ittumik pisoqartillugu, imm. 4-mi piffissaliussaavaq avaqqunneqarsinnaavoq.

§ 25. § 24 malillugu kommunalbestyrelsip nakkutilliinermi nalunaarusiami ilanngullugit allassinnaavai:

1) paasineqarsimasut paasissutissiissutaasimasullu pillugit oqaaseqaatit, aamma

2) pissutsit iluarsineqartariaqartut iliuuseqarfigineqartariaqartullu pillugit innersuussutit.

Imm. 2. Imm. 1 malillugu oqaaseqaatit innersuussutilluunniit ilaqutariit paarsisartut oqaloqatigineqareerneratigut suliarineqartassapput, aamma pissutsit aalajangersimasut oqaaseqaateqarnermut imaluunniit innersuussuteqarnermut tunngaviusut qanoq pitsaanerulersinneqarnissaannut imaluunniit aqqiiffigineqarsinnaanerannut ilitsersuummik imaqaassallutik.

Kapitali 5

Meeqqanut ulloq unnuarlu paaqqinniffinnik ingerlatsinermut sammititamik nakkutilliineq

§ 26. Meeqqat tapersorneqarnissaannut Inatsisartut inatsisaanni § 34-mi, imm. 1 malillugu meeqqanut ulloq unnuarlu paaqqinniffinni, matumani meeqqanut ulloq unnuarlu paaqqinniffiit immikkoortortaat isumannaallisakat ilanngullugit, Nakkutilliinermik ingerlatsivik ingerlatsinermut sammititamik nakkutilliissaaq. Ulloq unnuarlu paaqqinniffiup pitsaassusissamik attassiinnarnissaa

akuersissummilu piumasaqaatinik naammassinnittuarnissaa, kiisalu ulloq unnuarlu paaqqinniffiup Naalakkersuisullu akornanni ingerlatsinissamut tunngatillugu isumaqatigiissutip naammassineqarnissaa, nakkutilliinerup qulakkiissavaa.

Imm. 2. Ingerlatsinermut sammititamik nakkutilliinermut atatillugu, Nakkutilliinermik ingerlatsivik ulloq unnuarlu paaqqinniffimmi pissutsit misissorlugillu ulloq unnuarlu paaqqinniffimmi sulisunik oqaloqateqartassaaq.

Imm. 3. Nakkutilliinermik suliassamik isumaginninnermini Nakkutilliinermik ingerlatsivik ulloq unnuarlu paaqqinniffimmut nalunaaqqaarluni nakkutilliartortassaaq, paasissutissanillu ulloq unnuarlu paaqqinniffimmit pissarsisassalluni.

Imm. 4. Imm. 3 malillugu nalunaaqqaarluni nakkutilliartortarnerup saniatigut taamatuttaaq nalunaaqqaarani Nakkutilliinermik ingerlatsivik ulloq unnuarlu paaqqinniffimmut nakkutilliartorsinnaavoq.

Imm. 5. Imm. 1 malillugu nakkutilliineq toraagalimmik nakkutilliinertut ingerlanneqassaaq, tassani suliassa qarfiit toqqakkat taamaallaat ukkatarineqassallutik.

§ 27. § 26 malillugu ingerlatsinermut sammititamik nakkutilliineq ima ingerlanneqassaaq, assigiiaamik, ataqatigiissillugu aaqqissuussinermut tunngasumik uppersaaserluakkamik ulloq unnuarlu paaqqinniffiup kiffartuussissutaanik inissatigullu killiliussaanut, kiisalu ulloq unnuarlu paaqqiffiup suliassaminik suliarinninnerminut periaasaata nalilersuiffigineqarnissaanut tunngavissiissalluni.

Imm. 2. Inunnit suliamut tunngassuteqartunut, aaqqissuussaannerup aningaasaqarnerullu ataqatigiinnissaannik paasinnissinnaanissamut tunngavissaqartunit, tamannalu tunngavigalugu ulloq unnuarlu paaqqinniffimmut unammillernartitanik ineriartornissamullu periarfissanik nalunaaruteqarsinnaasunit, nakkutilliineq ingerlanneqassaaq.

Imm. 3. Nakkutilliinermut atatillugu Nakkutilliinermik ingerlatsiviup ulloq unnuarlu paaqqinniffimmi aqutsisut, sulisut meeqqallu inissinneqarsimasut oqaloqatigalugit peqataatittassavai. Nakkutilliinermut atatillugu meeqqanut angajoqqaatut oqartussaassuseqartut aamma ulloq unnuarlu paaqqinniffiup suleqatigisai oqaloqatigalugit peqataatinneqassapput.

Imm. 4. Nakkutilliinermut atatillugu siusinnerusukkut nakkutilliinermiit nalunaarusiaasimasuni oqaaseqaatit, inassuteqaateqarsimappallu inassuteqaatit peqqussutillu, aaqqissuussaasumik malitseqartinneqartarnissaat Nakkutilliinermik ingerlatsiviup qulakkiissavaa.

§ 28. § 26 malillugu ingerlatsinermut sammititamik nakkutilliinerup makku imarissavai:

- 1) Meeqqat ilinniarnissamut sulinissamullu periarfissaat.
- 2) Meeqqat nammineersinnaalernissaminnut periarfissaat aamma ilaquuttaminnut attaveqarfigisaminnullu atassuteqarnissaannut ikorfartorneqarnerat.
- 3) Ulloq unnuarlu paaqqinniffiup sullinniagai, matumani ulloq unnuarlu paaqqinniffiup sullinniakkaminut neqeroorutigisaata imarissai kiisalu meeqqat inuunerminnut sunniuteqaqataanerat ilanngullugit.
- 4) Ulloq unnuarlu paaqqinniffiup periaasii angusaalu, matumani perorsaanikkut, tarnip pissusai pillugit imaluunniit ilaqutariit peqqissarneqarnerannut suleriaatsit ilanngullugit.
- 5) Ulloq unnuarlu paaqqinniffiup aaqqissuussaanaa aqunneqarneralu.
- 6) Ulloq unnuarlu paaqqinniffiup sulisoqarnikkut piginnaasai.
- 7) Ulloq unnuarlu paaqqinniffiup aningaasaqarnera, matumani kukkunersiuisumit akuerisaasumit

naatsorsuutit kukkunersiorneqarsimanersut ilanngullugit.

8) Ulloq unnuarlu paaqqinniffimmi inissatigut atugassarititaasut, matumani sullinniakkat pisariaqartitaannut aamma ulloq unnuarlu paaqqinniffiup periaasaanut naapertuunnersut ilanngullugit.

Imm. 2. Sammineqartut tamarmik arlalinnik attuumassuteqartunik aalajangiinermut tunngavilersuutit itisilerneqassapput, katillugit ulloq unnuarlu paaqqinniffiup naleqquttumik paasisimasaqassusaanik takutitsisumik.

§ 29. Ulloq unnuarlu paaqqinniffiup ileqqoreqqusamini piumasaqaatinik naammassinninnersoq Nakkutilliinermik ingerlatsiviup nakkutigissavaa.

§ 30. § 26 malillugu Nakkutilliinermik ingerlatsivimmit qinnuigineqarnermigut ulloq unnuarlu paaqqinniffik, paasissutissanik ingerlatsinermut sammititamik nakkutilliinissamut pisariaqartinneqartunik, Nakkutilliinermik ingerlatsivimmut tunniussissaaq.

Imm. 2. Paasissutissanik ingerlatitseqqinneq nakkutilliinerup ingerlanneqarnissaanut pisariaqartut isigineqarpat, ulloq unnuarlu paaqqinniffimmit paasissutissanik Nakkutilliinermut ingerlatsivimmut ingerlatitseqqinneq, meeqqat angajoqqaatut oqartussaasui akuersiteqqaarnagit pisinnaavoq.

§ 31. Nakkutilliinermik ingerlatsivik ulloq unnuarlu paaqqinniffimmi pissutsinik ernumanartunik maluginiagaqarpat, meeraq imaluunniit meeqqat pissutsinik ernumanartunik sunnerneqarsinnaappata, Nakkutilliinermik ingerlatsivik isumaginninnermut aqutsisoqarfimmut aamma kommunalbestyrelsinut inissiisimasunut nalunaaruteqassaaq.

§ 32. Meeqqap ilorrisimaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat, Nakkutilliinermik ingerlatsivik kommunalbestyrelsimut inissiisuusimasumut erngerluni nalunaaruteqassaaq, uku tunngavigalugit:

- 1) meeqqamik amigartumik isumassuineq passussinerluunniit,
- 2) timikkut tarnikkulluunniit nakuuserfigineqarsimappat, paarinerlunneqarpat kinguaassiutitigulluunniit atornerlunneqarsimappat,
- 3) meeqqami atornerluinermik ajornartorsiutit, pinerluttutut pissusilersornerit imaluunniit allatigut annertuunik pissusilersornikkut naleqqussarniarnikkulluunniit ajornartorsiutit pillugit naammaginangitsumik suliarinnittoqarpat.

Imm. 2. Pissutit imm. 1-imi pineqartut pillugit meeraq inissinneqarsimasoq naammagittaalliorsimasoq nalunaarutiginnissimasorluunniit Nakkutilliinermik ingerlatsiviup nakkutilliinermini allatigulluunniit tusaruniuk, naammagittaalliorsimaneq nalunaarutiginnissimanerluunniit ingerlateqqinneqarsimanersoq, Nakkutilliinermik ingerlatsiviup misissussavaa.

Peqqussutit

§ 33. Nakkutilliinermik ingerlatsivik ulloq unnuarlu paaqqinnittarfimmut peqqussutit tunniussinnaavoq. Peqqussutip eqquutinneqarnissaanut piffissaliussamik Nakkutilliinermik ingerlatsivik aalajangersaasinnaavoq.

Imm. 2. Pissutsit peqqussuteqarnissamik eqqarsaateqarnermut tunngaviusut pillugit ulloq unnuarlu

paaqqinniffimmi sulisut oqaloqatigineqareernerisigut peqqussuteqarnissamik taamaallaat aalajangiisoqarsinnaavoq. Pissutsilli immikkut ittut pisariaqartilerpassuk peqqussuteqarnissaq ingerlaannartumik aalajangerneqarsinnaavoq.

Imm. 3. Ulloq unnuarlu paaqqinniffiup pissutsinik aalajangiinnermut tunngaviusunik aaqqiissuteqarsinnaanera aaqqiissuteqarusunneralu pissutissaqartumik ilimagineqarpat, peqqussuteqarnissamik taamaallaat aalajangiisoqarsinnaavoq.

Imm. 4. Imm. 1 malillugu peqqussummik eqquutsitsinissaq ulloq unnuarlu paaqqinniffiup akuersisummik peqaannarnissamut piumasaqaatinngortinneqarsinnaavoq.

Imm. 5. Ulloq unnuarlu paaqqinniffik imm. 1 malillugu peqqussutitik eqqortitsinnaangippat eqqortitserusunngippalluunniit, ulloq unnuarlu paaqqinniffimmut akuersissutip utertinneqarnissaa naalakkersuisoqarfiup isumaginninnermut akisussaasuusup, Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat malillugu aalajangersinnaavaa.

Imm. 6. Ulloq unnuarlu paaqqinniffiup akuersisummik peqaannarnissaanut piumasaqaatinngortinneqarsimasumik imm. 4 malillugu Nakkutilliinermik ingerlatsivik peqqussuteqarpat, tamanna pillugu kommunalbestyrelsinut inissiisuusut Nakkutilliinermik ingerlatsivik ilisimatitsissaaq.

Annertusisamik nakkutilliineq

§ 34. Immikkut nassuiakkamik sakkortusisamik nakkutilliisoqarnissaa pisariaqartinneqartoq nalilerneqarpat, Nakkutilliinermik ingerlatsivik annertusisamik nakkutilliisoqarnissaanik aalajangiisnaavoq. Sivisussusissaa pissutsit ataasiakkaat aalajangersimasut suuneri tunngavigalugit aalajangersarneqartassaaq, taamaattoorli piffissaq annerpaamik qaammatinik 3-nik sivisussuseqartukkuutaartinneqassalluni.

Imm. 2. Annertusisamik nakkutilliineq nalunaaqqaarluni nalunaaqqaaranilu ingerlanneqarsinnaavoq.

Imm. 3. Annertusisamik nakkutilliineq makkuninnga pissuteqarsinnaavoq:

- 1) ulloq unnuarlu paaqqinniffiit ataasiakkaat ajornartorsiutaat immikkut ittut nalinginnaasulluunniit misissoqqinneqarnissaat pisariaqartoq, nakkutilliinermik nalunaarussiaq inerniliippat,
- 2) ulloq unnuarlu paaqqinniffik naammagittaalliutigineqarsimappat,
- 3) ulloq unnuarlu paaqqinniffimmi Nakkutilliinermik ingerlatsiviup maluginiagai nalinginnaasut imaluunniit immikkut ittut, imaluunniit
- 4) ataatsimut naliliineq malillugu ulloq unnuarlu paaqqinniffik pisariaqartinneqartumik pitsaassuseerussimasoq.

Imm. 4. Pissutsit annertusisamik nakkutilliinissamik eqqarsaateqarnermut tunngaviusut pillugit, ulloq unnuarlu paaqqinniffimmi sulisut oqaloqatigineqareernerisigut taamaallaat annertusisamik nakkutilliisoqarnissaanik aalajangiisoqarsinnaavoq. Pissutsilli immikkut ittut pisariaqartilerpassuk annertusisamik nakkutilliisoqarnissaa erngerluni aalajangerneqarsinnaavoq.

Imm. 5. Ulloq unnuarlu paaqqinniffiup pissutsinik aalajangiinnermut tunngaviusunik aaqqiisnaanera aaqqeerusunneralu ilimanaateqarsorineqarpat, annertusisamik nakkutilliisoqarnissaanik taamaallaat aalajangiisoqarsinnaavoq. Ulloq unnuarlu paaqqinniffiup pissutsinik ernumanartunik aaqqiisnaanera imaluunniit aaqqeerusunnera ilimagineqanngippat, ulloq unnuarlu paaqqinniffimmut akuersissutip utertinneqarnissaa naalakkersuisoqarfiup isumaginninnermut akisussaasuusup Meeqqanut ulloq unnuarlu

paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat malillugu aalajangersinnaavaa.

Imm. 6. Nakkutilliinermik ingerlatsivik annertusisamik nakkutilliisoqarnissaanik aalajangiippat, kommunalbestyrelsit inissiisuusut Nakkutilliinermik ingerlatsivimmit ilisimatinneqassapput.

Nakkutilliinermik nalunaarusiaq

§ 35. §§ 26 aamma 34 malillugit ulloq unnuarlu paaqqinniffimmi ingerlatsinermut sammititamik nakkutilliinerit tamaasa Nakkutilliinermik ingerlatsivik nalunaarusiortassaaq.

Imm. 2. Nakkutilliinermik nalunaarusiami paasissutissat tulluuttut takuneqarsinnaassapput:

- 1) Ulloq nakkutilliiffusoq.
- 2) Kina nakkutilliinermik ingerlatsisimanersoq.
- 3) Nakkutilliineq nalunaaqqaarluni nalunaaqqaarniluunniit ingerlanneqarsimanersoq.
- 4) Nalinginnaasumik imaluunniit annertusisamik nakkutilliineq pineqarnersoq.
- 5) Nakkutilliinermik ingerlatsivik nakkutilliartortoqannginnerani paasissutissanik sunik piniarsimanersoq.
- 6) Nakkutilliinermik ingerlatsivik nakkutilliinermiut atatillugu kikkunnik oqaloqateqarsimanersoq.
- 7) Ineqartussat amerlassusissaat akuerineqartut naapertorlugit meeqqat qassit ulloq unnuarlu paaqqinniffimmi nalunaarsorneqarsimanersut, kiisalu meeqqat qassinik ukioqarnersut meeqqallu tapersorsorneqarnissamik pisariaqartitaat.
- 8) Ukiumi kingullermi pissaanermik atuinerit qassiusimanersut.
- 9) Nakkutilliinermi isiginiakkat.
- 10) Meeqqanik paaqqinniffimmiittuutigineqartutut nalunaarsukkanik ulloq unnuarlu paaqqinniffiup katsorsaannissaminut isumassuinnissaminullu suliarinninnissaminut piumasaqaatinik eqquutitsinersoq pillugu naliliineq.
- 11) Ulloq unnuarlu paaqqinnittarfimmut akuersissummi piumasaqaatit ulloq unnuarlu paaqqinniffimmit sulii eqquutinneqarnersut pillugu naliliineq.
- 12) Nakkutilliinerup malitsigisaanik qisuariartoqarsimappat qisuariaatit, matumani annertusisamik nakkutilliisoqarnissaanik aalajangiineq, peqqussuteqarneq, akuersisummik utertitsineq aamma paasissutissanik kommunalbestyrelsimut kommunalbestyrelsinuunniit inissiisimasunut ingerlatitseqqinneq ilanngullugit.

Imm. 3. § 26, imm. 5 malillugu toraagalimmik nakkutilliinermi nakkutilliinermik nalunaarusiaq suliaasaqarfii attuumassuteqartut ukkatarineqartut pillugit paasissutissanik taamaallaat imaqassaaq.

§ 36. § 35 malillugu inaarutaasumik nakkutilliinermik nalunaarusiap suliarineqareerluni ulloq unnuarlu paaqqinniffimmut nassiunneqannginnerani, nakkutilliinermik nalunaarusiaq minnerpaamik ullunik 14-inik piffissalerlugu ulloq unnuarlu paaqqinniffimmut, kiisalu oqartussaqaarfimmut ulloq unnuarlu paaqqinniffimmi ingerlatsisumut tusarniaassutigineqassaaq.

Imm. 2. Nakkutilliinermik nalunaarusiaq inaarutaasoq kingusinnerpaamik ullormi nakkutilliiffusimasumit kingullermi qaammatit pingasut qaangiunnerisa kingornatigut suliarineqareersimassaaq.

Imm. 3. Immikkut ittumik pisoqartillugu imm. 1-imi aamma 2-mi piffissaliussat avaqqunneqarsinnaapput.

Imm. 4. Nakkutilliinermik nalunaarusiaq isumaginninnermut aqutsisoqarfimmut kiisalu kommunalbestyrelsinut meeqqanik ulloq unnuarlu paaqqinniffimmut inissiisimasunut ilisimatitsissutitut

nassiunneqassaaq.

Imm. 5. Nakkutilliinermi nalunaarusiaq Naalakkersuisut nittartagaatigut kiisalu ulloq unnuarlu paaqqinniffiup nittartagaatigut tamanut saqqummiunneqassaaq.

§ 37. § 35 malillugu Nakkutilliinermik ingerlatsiviup nakkutilliinermi nalunaarusiami allassinnaavai:

- 1) paasineqarsimasut paasissutissiissutaasimasullu pillugit oqaaseqaatit, aamma
- 2) pissutsit iluarsineqartariaqartut iliuuseqarfigineqartariaqartullu pillugit innersuussutit.

Imm. 2. Imm. 1 malillugu oqaaseqaatit innersuussutilluunniit ulloq unnuarlu paaqqinniffiup oqaloqatigineqareerneratigut suliarineqartassapput, aamma pissutsit aalajangersimasut oqaaseqaateqarnermut imaluunniit innersuussuteqarnermut tunngaviusut qanoq pitsaanerulersinnaanerannut imaluunniit aaqqiiffigineqarsinnaanerannut ilitsersuummik imaqassallutik.

§ 38. § 35 malillugu nakkutilliinermi nalunaarusiami, innersuussuteqartoqarpat innersuussutinut imaluunniit peqqussuteqartoqarpata peqqussutinut tunngavigineqartut pillugit, pissutsit qanoq ilillugit aaqqiiviginiarneqarnissaat pillugu allaganngorlugu pilersaarusiamik suliaqassasoq, Nakkutilliinermi ingerlatsiviup ulloq unnuarlu paaqqinniffik innersuussinnaavaa peqqusinnaalluguluunniit, matumani piffissaliussat nalunaarutigineqarnerat ilanngullugu.

Kapitali 6

Inunnut innarluutilinnut najugaqarfissatut neqeroorutini najugaqartunut inummut sammititamik nakkutilliineq

§ 39. Inuup innarluutillip najugaqarfisaani kommunimi angerlarsimaffigisami kommunalbestyrelse najugaqarfissatut neqeroorummi ukiumut marloriarluni inummut sammititamik nakkutilliisassaaq.

Imm. 2. Inuk innarluutilik kommunimi allami najugaqarfissatut neqeroorummi najugaqarpat, kommunalbestyrelse inissiisoq kommunimi najugaqarfissatut neqeroorutip inissisimaffigisaani kommunalbestyrelsimut, kommunalbestyrelse inissiisoq sinnerlugu taassuma nakkutilliinissaa pillugu, isumaqatigiissusiorsinnaavoq.

Imm. 3. Imm. 2 malillugu nakkutilliinissamik isumaqatigiissusiortoqarsimappat nalunaarummi matumani aalajangersakkat malillugit nakkutilliisoqarnissaa kommunalbestyrelsip inissiisup sulis akisussaaffigissavaa.

§ 40. § 39 malillugu inummut sammititamik nakkutilliineq, ima aaqqissugaassaaq inuup innarluutillip iliuusissanut pilersaarutaa najugaqarfissatut neqeroorummit malinneqarnissaa, aamma inuup pisariaqartitaanut tapersersuutit naammannissaat naleqqunnissaallu ingerlaavartumik qulakkeerneqassalluni, matuma ataaniittut ilanngullugit:

- 1) inuup innarluutillip najugaqarfissatut neqeroorummi sumiginarneqannginnissaa imaluunniit atornerlunneqannginnissaa,
- 2) inuup taassumalu angajoqqaatut sinniisoqaruni sinnisorisaata imaluunniit angajoqqaatut oqartussaasuisa pisinnaatitaaffimminnik ilisimatinneqarsimanissaat,
- 3) inuup peqataaffigisaani suliat pillugit naammagittaalliortoqarsimappat naammagittaalliutit inernerat, inummut taassumalu angajoqqaatut sinniisoqaruni sinnisorisaata imaluunniit angajoqqaatut oqartussaasuisa kiisalu inuup sulianik sullissisuanut anngunneqarnissaat,
- 4) iliuusissanut pilersaarummi anguniakkat najugaqarfissatut neqeroorummut innissinneqarnermi

naammassineqarsinnaanerit,

5) najugaqarfissatut neqeroorummi periaatsit inummut piukkunnartuussasut aamma

6) pissaanermik atuisimanerit malitseqartinneqartassasut, nalunaarutillu tunngavigalugit, tamanna pillugu inuk najugaqarfissatut neqeroorummi eqqortumik tapersorsorneqarnersooq naliliiffigineqarnissaa qulakkeerneqassasoq.

Imm. 2. Inuit innarluutillit tapersorsorneqarnissaat pillugu Inatsisartut inatsisaanni § 48 malillugu inuk ulloq unnuarlu paaqqinniffimmi najugaqarpat, nakkutilliinerup makku aamma qulakkiissavai:

1) ulloq unnuarlu paaqqinniffimmit killiffinnut nalunaarusiat aamma ineriartortitsinissamut pilersaarutininik suliaqarnikkut ingerlaavartumik qisuariartoqartarnissaa, aamma

2) inuup inuttut ineriartornera, ilorrisimaarnera peqqissusialu iliuusissanut aamma ineriartortitsinissamut pilersaarutit suliarineqarsimasut malinneqarnissaat.

§ 41. § 39 malillugu inummut sammititamik nakkutilliinermut atatillugu inuk innarluutilik kommunalbestyrelsimit oqaloqatigineqassaaq.

Imm. 2. Imm. 1 malillugu kommunalbestyrelsip oqaloqatiginninnermini inuup innarluuteqarnera mianerissavaa aammalu oqaloqatigiinneq inuup innarluutillip piumasai tunngavigalugit ingerlatissallugu.

Imm. 3. Imm. 1 malillugu kommunalbestyrelse oqaloqatiginninnermini Inuit innarluutillit tapersorsorneqarnissaat pillugu Inatsisartut inatsisaanni § 24 malillugu inuk isumaginninnermi sulianik ilisimasalimmik illersuisoqarnissaanik neqeroorfigissavaa.

Imm. 4. Inuk innarluutilik 18-it inorlugit ukioqarpat imaluunniit nammineersinnaajunnaarsitaasimappat imm. 1 malillugu oqaloqatigineqarnera, inuk innarluutilik, taassumalu angajoqqaatut akisussaasui imaluunniit angajoqqaatut sinniisoqarsimaguni sinniisua, peqataatillugit ingerlanneqassaaq. Taamaattoq inummut innarluutilimmut mianerisassat tamanna pisariaqartippassuk, angajoqqaatut oqartussaasut imaluunniit angajoqqaatut sinniisuusoq akuersitinnagu imaluunniit najuutsinnagu oqaloqateqarneq ingerlanneqarsinnaavoq. Angajoqqaatut akisussaasut imaluunniit angajoqqaatut sinniisoq akuersiteqqaarnagit peqataatinnagilluunniit oqaloqateqarneq ingerlanneqassappat, taava § 24 malillugu illersuisumik toqqaasoqassaaq ilaasoqarlunilu.

Imm. 5. Inuup inerisimanagera piginnaasaqarneralu imaluunniit suliap suussusaa eqqarsaatigalugit oqaloqateqarnerup ingerlanneqarnissaa aalajangiisuusumik naleqqutinngippat, imm. 1 malillugu oqaloqateqarneq ingerlanneqassanngitsoq kommunalbestyrelsip aalajangersinnaavaa. Oqaloqateqarneq ingerlanneqarsinnaanngippat, inuup innarluutillip aalajangiinissatut eqqarsaatigineqartumut isumaa allatut pissarsiariniarneqassaaq.

§ 42. § 39 malillugu kommunalbestyrelse inummut sammititamik nakkutilliinermut atatillugu najugaqarfissatut neqeroorummi pissutsinik ernumanartunik maluginiagaqarpat, inuillu najugaqarfissatut neqeroorummiittut pissutsinik ernumanartunik sunnerneqarsinnaappata, oqartussaasoqarfimmut ingerlatsineq pillugu nakkutilliisussaataasumut kiisalu kommunalbestyrelsinut inissiisimasunut kommunalbestyrelse nalunaaruteqassaaq.

§ 43. § 39 malillugu kommunalbestyrelse inummut sammititamik nakkutilliinerit tamaasa nakkutilliinermiit nalunaarusiamik suliaqartassaaq.

Imm. 2. Nakkutilliinermiit nalunaarusiami paasissutissat tulluuttut takuneqarsinnaassapput:

- 1) Ulloq nakkutilliiffusoq.
 - 2) Kina nakkutilliinermik ingerlatsisimanersoq.
 - 3) Nakkutilliiartortoqannginnerani kommunalbestyrelse paasissutissanik sunik piniarsimanersoq.
 - 4) Kommunalbestyrelse nakkutilliinermi ataatillugu kikkunnik oqaloqateqarsimanersoq.
 - 5) Nakkutilliinermi isiginiakkat.
 - 6) Inuup pisariaqartitaanik ineriartornissamullu periarfissaanik najugaqarfissatut neqeroorutip isumaginninneranik nalilersuinerit.
 - 7) Nakkutilliinerup malitsigisaanik qisuariaataasinnaasut, matumani kommunimut angerlarsimaffiusumut paasissutissanik ingerlatitseqqinnerit ilanngullugit.
- Imm. 3. § 41, imm. 5 malillugu kommunalbestyrelse inummik oqaloqateqarsimanngippat oqaloqatiginnissimannginnermut pequtaasoq nakkutilliineq pillugu nalunaarusiami allanneqassaaq.*

Kapitali 7

Najugaqaratigiiiffinnik najugaqarfinnillu illersugaasunik ingerlatsinermut sammititamik nakkutilliineq

§ 44. Kommunalbestyrelse ukiumut ataasiarluni aamma pisariaqartitsineq naapertorlugu najugaqaratigiiiffinnik najugaqarfinnillu illersugaasunik kommunalbestyrelsimut pilersinneqarsimasunik ingerlanneqartunillu ingerlatsinermut sammititamik nakkutilliisassaaq. Najugaqarfissatut neqeroorutip sulii pisariaqartinneqartumik pitsaassuseqarnersut nakkutilliinerup qulakkiissavaa.

Imm. 2. Kommunalbestyrelsip nakkutilliinermut ataatillugu najugaqarfissatut neqeroorummi pissutsit misissorlugillu najugaqarfissatut neqeroorut oqaloqatigissavaa.

Imm. 3. Kommunalbestyrelsip nakkutilliinermi:

- 1) najugaqarfissatut neqeroorut nalunaaqqaarluni nakkutilliiartorfigisassavaa,
- 2) najugaqarfissatut neqeroorut paasissutissanik attuumassuteqartunik pissarsiffigissavaa, aamma
- 3) inunnit najugaqarfissatut neqeroorummi najugaqartunit paasissutissanik pissarsiniassaaq.

Imm. 4. Kommunalbestyrelsip imm. 3 nr. 1 malillugu nalunaaqqaarluni nakkutilliiartornermi saniatigut taamatuttaaq najugaqarfissatut neqeroorut nalunaaqqaarnani nakkutilliiartorfigisinnaavaa.

§ 45. § 44 malillugu ingerlatsinermut sammititamik nakkutilliineq ima ingerlanneqassaaq, taamaalilluni assigiissumik, ataatigiiissillugu aqqissuussaasumik uppersaaserluakkamillu najugaqarfissatut neqeroorutip kiffartuussissutaanik inissatigullu atugassarititaanik, kiisalu najugaqarfissatut neqeroorutip suliaasinik isumaginnittarneranik, nalilersuinissamut tunngavissiisalluni.

Imm. 2. Inunnit suliaq, aqqissuusaanerup aningaasaqarnerullu ataatigiiinnissaannik paasinnissinnaasunit, taamalu najugaqarfissatut neqeroorutip unammillernartoqartitaanik ingerlariaqqinnissamullu periarfissaanik nalunaaruteqarsinnaasunit, nakkutilliineq ingerlanneqassaaq.

Imm. 3. Nakkutilliinermi kommunalbestyrelsip nakkutilliinermi ataatillugu oqaloqatiginninnermigut najugaqarfissatut neqeroorummi aqutsisut, sulisut inuillu najugaqartut peqataatissavai. Najugaqartut angajoqqaatut sinniisoqarpata, sinniisut aamma angajoqqaatut oqartussaasut, qanigisaasut allat imaluunniit suleqatigineqartut nakkutilliinermut ataatillugu oqaloqatiginninnermi peqataatinneqarsinnaapput.

Imm. 4. Siusinnerusukut nakkutilliinermi nalunaarusiaasimasuni oqaaseqaatit, inassutigisimasat

peqqussutillu aaqqissuussaasumik malitseqartinneqartarnissaat kommunalbestyrelsip nakkutilliinermut atatillugu qulakkiissavaa.

§ 46. § 44 malillugu ingerlatsinermut sammititamik nakkutilliinerup makku imarissavai:

- 1) Najugaqartut ilinniarnissamut, sulilernissamut sammisassaqaarnissamulluunniit periarfissaat.
- 2) Najugaqartut ineriartornissaminut periarfissaat, piginnaasatik naapertorlugit nammineq periarfissaqarfimminnik atorluaasinnaanissaat, tamatumuunakkullu sapinngisaq tamaat nammineersinnaanissaat.
- 3) Najugaqarfissatut neqeroorutip sullinniagai, matumani najugaqarfissatut neqeroorutip sullinniakkanut neqeroorutai aamma najugaqartut namminneq inuunerminnullu sunniuteqarsinnaanerat ilanngullugit.
- 4) Najugaqarfissatut neqeroorummi periaatsit angusallu, matumani perorsaanermi, tarnip pissusii pillugit imaluunniit psykiatrimut tunngasut pillugit sulisaatsit ilanngullugit.
- 5) Najugaqarfissatut neqeroorutimmi aaqqissuussaaneq aqutsinerlu.
- 6) Najugaqarfissatut neqeroorummi sulisoqarnikkut piginnaasat.
- 7) Najugaqarfissatut neqeroorummi inissatigut killissarititaasut, matumani sullinniakkat pisariaqartitaannik najugaqarfissatullu neqeroorutip periaasiinut ikorfartuinersut ilanngullugit.

Imm. 2. Sammineqartut tamarmik aalajangiinermi tunngaviit naleqquttut atorlugit itisilernerqassapput, taakkulu katillugit najugaqarfissatut neqeroorut pillugu ataatsimut isiginnittumik ersersitsissapput.

§ 47. Najugaqarfissatut neqeroorutip ileqqoreqqusamini piumasaqaatinik naammassinninnersoq kommunalbestyrelsip nakkutigissavaa.

§ 48. § 44 malillugu kommunalbestyrelsip ingerlatsinermut sammititamik nakkutilliinissaminut paasissutissat pisariaqartitai pillugit najugaqarfissatut neqeroorut qinnuigineqaruni, paasissutissat kommunalbestyrelsimut tunniutissavai.

Imm. 2. Najugaqarfissatut neqeroorummit paasissutissanik kommunalbestyrelsimut ingerlatitseqqinneq, ingerlatitseqqinneq nakkutilliinissamut pisariaqartutut isigineqarpat,, najugaqartut imaluunniit taakku angajoqqaatut sinnisoqarsimagunik sinnisui imaluunniit angajoqqaatut oqartussaassuseqartut akuersiteqqaarnagit pisinnaavoq.

§ 49. § 44 malillugu kommunalbestyrelse ingerlatsinermut sammititamik nakkutilliinermi atatillugu najugaqarfissatut neqeroorummi pissutsinik ernumanartunik maluginiagaqarpat, najugaqartoq pissutsinik ernumanartunik sunnerneqarsinnaappat, kommunalbestyrelsimut inissiisuusimasumut kommunalbestyrelse nalunaaruteqassaaq.

Nakkutilliinermi nalunaarusiaq

§ 50. § 44 malillugu ingerlatsinermut sammititamik nakkutilliinerit tamaasa kommunalbestyrelse nakkutilliinermi nalunaarusiamik suliaqartassaaq.

Imm. 2. Nakkutilliinermi nalunaarusiami paasissutissat tulluuttut takuneqarsinnaassapput:

- 1) Ulloq nakkutilliiffusoq.
- 2) Kina nakkutilliinermik ingerlatsisimanersoq.

- 3) Nakkutilliineq nalunaaqqaarluni nalunaaqqaarniluunniit ingerlaneqarsimanersoq.
- 4) Nakkutilliiartortoqannginnerani kommunalbestyrelse paasissutissanik sunik piniarsimanersoq.
- 5) Kommunalbestyrelse nakkutilliinermiut atatillugu kikkunnik oqaloqateqarsimanersoq.
- 6) Atorfinnut akuerisaasunut naleqqiullugu najugaqarfissatut neqeroorummi najugaqartut amerlassusaat aamma najugaqartut tapersersorneqarnissamik pisariaqartitaat.
- 7) Ukiumi kingullermi pissaanermik atuinerit qassiusimanersut.
- 8) Nakkutilliinermi maluginiarneqartut.
- 9) Najugaqartut pisariaqartitaannik ineriartornissamullu periarfissaannik najugaqarfissatut neqeroorutip nalilersorneqarnera.
- 10) Nakkutilliinerup malitsigisaanik qisuariartoqarsimappat qisuariaatit, matumani kommunalbestyrelsimut imaluunniit kommunalbestyrelsinut inissiisimasunut paasissutissanik ingerlatitseqqinnerit ilanngullugit.

Imm. 3. Nakkutilliinermiut nalunaarusiaq najugaqarfissatut neqeroorummut ulluni 14-ini tusarniaanermut akissuteqarnissaannut piffissalerlugit tusarniaassutigineqassaaq. Inaarutaasumik nakkutilliinermiut nalunaarusiap assilineqarnera najugaqarfissatut neqeroorummut nassiunneqassaaq.

Imm. 4. Immikkut ittumik pisoqartillugu imm. 3-mi piffissaliussaq avaqqunneqarsinnaavoq.

§ 51. § 50 malillugu kommunalbestyrelsip nakkutilliinermiut nalunaarusiami ilanngullugit taasinnaavai:

- 1) paasineqarsimasut paasissutissiisutaasimasullu pillugit oqaaseqaatit, aamma
- 2) pissutsit iluarsineqartariaqartut iliuuseqarfigneqartariaqartullu pillugit innersuussutit.

Imm. 2. Imm. 1 malillugu oqaaseqaatit innersuussutilluunniit najugaqarfissatut neqeroorutip oqaloqatigineqareerneratigut suliarineqartassapput, aamma pissutsit aalajangersimasut oqaaseqaateqarnermut imaluunniit innersuussuteqarnermut tunngaviusut qanoq pitsaanerulersinneqarnissaannut imaluunniit aaqqiiffigneqarsinnaanerannut ilitersuummik imaqaassallutik.

Kapitali 8

Inunnut innarluutilinnut ulloq unnuarlu neqeroorutiniq ingerlatsinermut sammititamik nakkutilliineq

§ 52. Inuit innarluutillit tapersersorneqarnissaannut Inatsisartut inatsisaanni § 18, imm. 1 malillugu Nakkutilliinermik ingerlatsiviup ingerlatsinermut sammititamik inunnut innarluutilinnut ulloq unnuarlu neqeroorutiniq nakkutilliissapput, matumani ulloq unnuarlu neqeroorutit matoqqasut ilanngullugit. Ulloq unnuarlu neqeroorummi pitsaassutsit pisariaqartinneqartut sulii pigineqarnersut, aamma ulloq unnuarlu paaqqinniffiup aamma Naalakkersuisut akornanni ingerlatsinissamut isumaqatigiissutip naammassineqarnera, nakkutilliinerup qulakkiissavaa.

Imm. 2. Nakkutilliinermik ingerlatsivik ingerlatsinermut sammititamik nakkutilliinermut atatillugu ulloq unnuarlu paaqqinniffimmi pissutsit misissorlugillu ulloq unnuarlu paaqqinniffimmi sulisunik oqaloqateqassaaq.

Imm. 3. Nakkutilliinermik ingerlatsivik nakkutilliinermik suliaasamik isumaginninnermini ulloq unnuarlu paaqqinniffimmut nalunaaqqaarluni nakkutilliiartussaap, paasissutissanillu ulloq unnuarlu paaqqinniffimmit pissarsissalluni.

Imm. 4. Nakkutilliinermik ingerlatsivik imm. 3 malillugu nalunaaqqaarluni nakkutilliiartornerup saniatigut

aamma nalunaappaarani ulloq unnuarlu paaqqinnittarfimmut nakkutilliiartorsinnaavoq.

Imm. 5. Imm. 1 malillugu nakkutillineq toraagalimmik nakkutilliinertut ingerlanneqarsinnaavoq, tassani suliaasaqarfii toqqakkat taamaallaat ukkatarineqassallutik.

§ 53. § 52 malillugu ingerlatsinermut sammititamik nakkutillineq ima ingerlanneqassaaq, nakkutillineq assigiiartumik, aqqissuussaasumik uppersaaserluakkamillu ulloq unnuarlu paaqqinniffiup kiffartuussissutaanik inissatigullu atugassarititaanik, kiisalu ulloq unnuarlu paaqqittarfiup suliaasamik isumaginnittarneranik nalilersuinissamut tunngavissiissalluni.

Imm. 2. Inunnit suliamut tunngassuteqartut ataqatigiinnissaannik paasinnissinnaanissamut tunngavissaqartunit, tamannalu tunngavigalugu ulloq unnuarlu neqeroorutip unammillernartitaanik ineriartornissamullu periarfissaanik tassunga nalunaaruteqarsinnaasunit nakkutillineq ingerlanneqassaaq.

Imm. 3. Nakkutilliinermut atatillugu Nakkutilliinermik ingerlatsiviup ulloq unnuarlu paaqqinniffimmi aqutsisut, sulisut meeqqallu inissinneqarsimasut oqaloqatigalugit peqataatittassavai. Angajoqqaatut sinnisoqarsimappat angajoqqaatut sinniisut imaluunniit angajoqqaatut oqartussaasut, qanigisat allat imaluunniit suleqatigisat nakkutilliinermut atatillugu oqaloqatigiinnikkut peqataatinneqarsinnaapput.

Imm. 4. Nakkutilliinermut atatillugu siusinnerusukkut nakkutilliinermi nalunaarusiaasimasuni oqaaseqaatit, inassuteqaatit peqqussuteqarsimappallu peqqussutit aqqissuussaasumik malitseqartinneqartarnissaat Nakkutilliinermik ingerlatsivimmit qulakkeerneqassaaq.

§ 54. § 52 malillugu ingerlatsinermut sammititamik nakkutilliinerup makku imarissavai:

- 1) Najugaqartut ilinniarnissamut, sulinissamut sammisassaqartinneqarnissamulluunniit periarfissaat
- 2) Najugaqartut ineriartornissaminut periarfissaat, piginnaasat naapertorlugit nammineq periarfissaqarfimminik atorluaasinnaanissat, tamatumuunakkullu sapinngisaq tamaat nammineersinnaanissaat.
- 3) Ulloq unnuarlu neqeroorutip sullinniagai, matumani ulloq unnuarlu neqeroorutip sullinniakkanut neqeroorutai aamma najugaqartut namminneq inuunerminnullu sunniuteqarsinnaanerat ilanngullugit.
- 4) Ulloq unnuarlu neqeroorummi periaatsit angusallu, matumani perorsaanermi, tarnip pissusii pillugit imaluunniit psykiatrimut tunngasut pillugit sulisaatsit ilanngullugit.
- 5) Ulloq unnuarlu neqeroorummi aqqissuussaaneq aqutsinerlu.
- 6) Ulloq unnuarlu neqeroorummi sulisoqarnikkut piginnaasat.
- 7) Ulloq unnuarlu neqeroorummi inissatigut killissarititaasut, matumani sullinniakkat pisariaqartitaannik ulloq unnuarlu neqeroorutip periaasiinut ikorfartuinersut ilanngullugit.

Imm. 2. Sammineqartut tamarmik aalajangiinermi tunngaviit naleqquttut atorlugit itisilerneqassapput, taakkulu katillugit ulloq unnuarlu neqeroorut pillugu ataatsimut isiginnittumik ersersitsissapput.

§ 55. Ulloq unnuarlu paaqqinniffik ileqqoreqqusanik malinninnersoq Nakkutilliinermik ingerlatsiviup nakkutigissavaa.

§ 56. § 52 malillugu Nakkutilliinermik ingerlatsiviup ingerlatsinermut sammititamik nakkutilliinissaminut paasissutissat pisariaqartitai pillugit ulloq unnuarlu neqeroorut qinnuigineqarnini tunngavigalugu, paasissutissanik Nakkutilliinermik ingerlatsivimmut tunniussissaaq.

Imm. 2. Ulloq unnuarlu paaqqinniffimmit paasissutissanik ingerlatitseqqinneq nakkutilliinissamut pisariaqartuusorineqarpat, Nakkutilliinermik ingerlatsivimmut paasissutissanik ingerlatitseqqinneq, najugaqartut imaluunniit taakku angajoqqaatut sinniisoqarsimagunik sinniisui imaluunniit angajoqqaatut oqartussaassuseqartut akuersiteqqaarnagit pisinnaavoq.

§ 57. Nakkutilliinermik ingerlatsivik ulloq unnuarlu paaqqinniffimmi pissutsinik ernumanartunik maluginiagaqarpat, najugaqartullu pissutsinik ernumanartunik sunnerneqarsinnaappata, Nakkutilliinermik ingerlatsivik isumaginninnermut aqutsisoqarfimmut aamma kommunalbestyrelsinut inissiisimasunut nalunaaruteqartassaaq.

§ 58. Najugaqartup ilorrisimaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat, Nakkutilliinermik ingerlatsivik kommunalbestyrelsimut inissiisuusimasumut erngerluni nalunaaruteqassaaq uku tunngavigalugit:

- 1) inummik amigartumik isumassuineq passussinerluunniit,
- 2) timikkut tarnikkulluunniit nakuuserfigineqarsimappat, paarinerlunneqarpat kinguaassiutitigulluunniit atornerlunneqarsimappat,
- 3) inummi atornerluisuunermik ajornartorsiutit, pinerluttutut pissusilersortarnerit imaluunniit allatigut annertuumik pissusilersortarnikkut naleqqussarnikkulluunniit ajornartorsiutai pillugit naammanngitsunik suliarinnittoqarpat.

Imm. 2. Pissutsit imm. 1-imi pineqartut pillugit najugaqartoq naammagittaalliorsimasooq nalunaarutiginnissimasorluunniit Nakkutilliinermik ingerlatsiviup nakkutilliinermini allatigulluunniit tusaruniuk, naammagittaalliorsimaneq nalunaarutiginnissimanerluunniit ingerlateqqinneqarsimanersooq Nakkutilliinermik ingerlatsiviup misissussavaa.

Peqqussutit

§ 59. Nakkutilliinermik ingerlatsivik ulloq unnuarlu neqeroorummot peqqussutininik tunniussisinnaavoq. Peqqussutit eqquutsinneqarnissaanut piffissaliussamik Nakkutilliinermik ingerlatsivik aalajangersaasinnaavoq.

Imm. 2. Pissutsit peqqussuteqarnissamik eqqarsaateqarnermut tunngaviusut pillugit ulloq unnuarlu paaqqinniffimmi sulisut oqaloqatigineqareernerisigut peqqussuteqarnissamik taamaallaat aalajangiisoqarsinnaavoq. Pissutsilli immikkut ittut pisariaqartilerpassuk peqqussuteqarnissaq ingerlaannartumik aalajangerneqarsinnaavoq.

Imm. 3. Ulloq unnuarlu paaqqinniffiup pissutsinik aalajangiinermut tunngaviusunik aaqqiissuteqarsinnaanera aaqqiissuteqarusunneralu pissutissaqartumik ilimagineqarpat, peqqussuteqarnissamik taamaallaat aalajangiisoqarsinnaavoq.

Annertusisamik nakkutilliineq

§ 60. Immikkut nassuiakkamik sakkortusisamik nakkutilliisoqarnissaa pisariaqartinneqartoq nalilerneqarpat, Nakkutilliinermik ingerlatsivik annertusisamik nakkutilliisoqarnissaanik aalajangiisinnaavoq. Sivisussusissaa pissutsit ataasiakkaat aalajangersimasut suuneri tunngavigalugit

aalajangersarneqartassaaq, taamaattorli piffissaq annerpaamik qaammatinik 3-nik sivilissuseqartukkuutaarneqassalluni.

Imm. 2. Annertusisamik nakkutilliineq nalunaaqqaarluni nalunaaqqaaranilu ingerlanneqarsinnaavoq.

Imm. 3. Annertusisamik nakkutilliineq makkuninnga pissuteqarsinnaavoq:

- 1) ulloq unnuarlu paaqqinniffiit ataasiakkaat ajornartorsiutaat immikkut ittut nalinginnaasulluunniit misissoqqinneqarnissaat pisariaqartoq, nakkutilliinermiit nalunaarusiaq taaseq inerniliippat,
- 2) ulloq unnuarlu paaqqinniffik naammagittaalliutigineqarsimappat,
- 3) ulloq unnuarlu paaqqinniffimmi Nakkutilliinermik ingerlatsiviup maluginiagai nalinginnaasut imaluunniit immikkut ittut, imaluunniit
- 4) ataatsimut naliliineq malillugu ulloq unnuarlu paaqqinniffik pisariaqartinneqartumik pitsaassuseerussimasoq.

Imm. 4. Pissutsit annertusisamik nakkutilliinissamik eqqarsaateqarnermut tunngaviusut pillugit, ulloq unnuarlu paaqqinniffimmi sulisut oqaloqatigineqareernerisigut taamaallaat annertusisamik nakkutilliisoqarnissaanik aalajangiisoqarsinnaavoq. Pissutsilli immikkut ittut pisariaqartilerpasuk annertusisamik nakkutilliisoqarnissaa erngarluni aalajangerneqarsinnaavoq.

Imm. 5. Ulloq unnuarlu paaqqinniffiup pissutsinik aalajangiinermut tunngaviusunik aqqiisinaanera aaqpeerusunneralu ilimanaateqarsorineqarpat annertusisamik nakkutilliisoqarnissaanik taamaallaat aalajangiisoqarsinnaavoq.

Nakkutilliinermiit nalunaarusiaq

§ 61. §§ 52 aamma 60 malillugit ulloq unnuarlu paaqqinniffimmi ingerlatsinermut sammititamik nakkutilliinerit tamaasa Nakkutilliinermik ingerlatsivik nalunaarusiortassaaq.

Imm. 2. Nakkutilliinermiit nalunaarusiami paasissutissat tulluuttut takuneqarsinnaassapput:

- 1) Ulloq nakkutilliiffusoq.
- 2) Kina nakkutilliinermik ingerlatsisimanersoq.
- 3) Nakkutilliineq nalunaaqqaarluni nalunaaqqaaraniluunniit ingerlanneqarsimanersoq.
- 4) Nalinginnaasumik imaluunniit annertusisamik nakkutilliineq pineqarnersoq.
- 5) Nakkutilliinermik ingerlatsivik nakkutilliartortoqannginnerani paasissutissanik sunik piniarsimanersoq.
- 6) Nakkutilliinermik ingerlatsivik nakkutilliinermiit atatillugu kikkunnik oqaloqateqarsimanersoq.
- 7) Ineqartussat amerlassusissaat akuerineqartut naapertorlugit meeqqat qassit ulloq unnuarlu paaqqinniffimmi nalunaarsorneqarsimanersut, kiisalu meeqqat qassinik ukioqarnersut meeqqallu tapersorsorneqarnissamik pisariaqartitaat.
- 8) Ukiumi kingullermi pissaanermik atuinerit qassiusimanersut.
- 9) Nakkutilliinermi isiginiakkat.
- 10) Meeqqanik paaqqinniffimmiittuutigineqartutut nalunaarsukkanik ulloq unnuarlu paaqqinniffiup katsorsaaniissaminut isumassuiniissaminullu suliarinninnissaminut piumasaqaatinik eqquutitsinersoq pillugu naliliineq.
- 11) Ulloq unnuarlu paaqqinnittarfirmut akuersissummi piumasaqaatit ulloq unnuarlu paaqqinniffimmit sulit eqquutinneqarnersut pillugu naliliineq.
- 12) Nakkutilliinerup malitsigisaanik qisuariartoqarsimappat qisuariaatit, matumani annertusisamik nakkutilliisoqarnissaanik aalajangiineq, peqqussuteqarneq, akuersissummik utertitsineq aamma

paasissutissanik kommunalbestyrelsimut kommunalbestyrelsinulluunniit inissiisimasunut ingerlatitseqqinneq ilanngullugit.

Imm. 3. § 52, imm. 5 malillugu toraagalimmik nakkutilliinermi nakkutilliinermiit nalunaarusiaq suliaasaqarfii attuumassuteqartut ukkatarineqartut pillugit paasissutissanik taamaallaat imaqaassaaq.

§ 62. § 61 malillugu inaarutaasumik nakkutilliinermiit nalunaarusiap suliarineqareerluni ulloq unnuarlu neqeroorummumt nassiunneqannginnerani, nakkutilliinermiit nalunaarusiaq minnerpaamik ullunik 14-inik piffissalerlugu ulloq unnuarlu neqeroorummumt kiisalu isumaginninnermut aqutsisoqarfimmumt tusarniaassutigineqassaaq.

Imm. 2. Nakkutilliinermiit nalunaarusiaq inaarutaasoq kingusinnerpaamik ullormi nakkutilliiffusimasumit kingullermiit qaammatit pingasut qaangiunnerisa kingornatigut suliarineqareersimassaaq.

Imm. 3. Immikkut ittumik pisoqartillugu imm. 1-imi aamma 2-mi piffissaliussat avaqqunneqarsinnaapput.

Imm. 4. Nakkutilliinermiit nalunaarusiaq isumaginninnermut aqutsisoqarfimmumt kiisalu kommunalbestyrelsinut meeqqanik ulloq unnuarlu paaqqinniffimmumt inissiisimasunut ilisimatitsissutitut nassiunneqassaaq.

Imm. 5. Nakkutilliinermiit nalunaarusiaq Naalakkersuisut nittartagaatigut kiisalu ulloq unnuarlu paaqqinniffiup nittartagaatigut tamanut saqqummiunneqassaaq.

§ 63. § 61 malillugu Nakkutilliinermik ingerlatsiviup nakkutilliinermiit nalunaarusiami allassinnaavai:

1) paasineqarsimasut paasissutissiissutaasimasullu pillugit oqaaseqaatit, aamma

2) pissutsit iluarsineqartariaqartut iliuseqarfigineqartariaqartullu pillugit innersuussutit.

Imm. 2. Imm. 1 malillugu oqaaseqaatit innersuussutilluunniit ulloq unnuarlu paaqqinniffiup oqaloqatigineqareerneratigut suliarineqartassapput, aamma pissutsit aalajangersimasut oqaaseqaateqarnermut imaluunniit innersuussuteqarnermut tunngaviusut qanoq pitsaanerulersinnaanerannut imaluunniit aaqqiiffigineqarsinnaanerannut ilitsersuummik imaqaassallutik.

§ 64. § 61 malillugu nakkutilliinermiit nalunaarusiami, innersuussuteqartoqarpat innersuussutinut imaluunniit peqqussuteqartoqarpata peqqussutinut tunngavigineqartut pillugit, pissutsit qanoq ilillugit aaqqiiviginiarneqarnissaat pillugu allaganngorlugu pilersaarusiamik suliaqaassasoq Nakkutilliinermiit ingerlatsiviup ulloq unnuarlu neqeroorut innersuussinnaavaa peqqusinnaalluguluunniit, matumani piffissaliussat nalunaarutigineqarnerat ilanngullugu.

Kapitali 9

Utoqqarnik paaqqinniffinnik ingerlatsinermut sammititamik nakkutilliineq

§ 65. Utoqqarnik paaqqinniffiit kommunalbestyrelsimiit pilersinneqarsimasut ingerlanneqartullu ingerlatsinermut sammititamik kommunalbestyrelsimiit ukiumut ataasiarluni aamma pisariaqartitsineq naapertorlugu nakkutilliivigineqartassapput. Utoqqarnik paaqqiffimmi pitsaassuseq pisariaqartinneqartoq suli pigineqarnerasoq nakkutilliinerup qulakkiissavaa.

Imm. 2. Kommunalbestyrelsip nakkutilliinermiit atatillugu utoqqarnut paaqqinniffinni pissutsit nakkutigalugillu utoqqarni paaqqinniffinni sulisut oqaloqatigissavai.

Imm. 3. Kommunalbestyrelsip nakkutilliinermi:

- 1) utoqqarnik paaqqinniffik nalunaaqqaarluni nakkutilliiartorfigisassavaa,
- 2) utoqqarnik paaqqinniffik paasissutissanik piniarfigisassavaa, aamma
- 3) inunnit utoqqarnit paaqqinniffinniittunit paasissutissanik attuumassuteqartunik pissarsiniassaaq.

Imm. 4. Kommunalbestyrelsip imm. 3 nr. 1 malillugu nalunaaqqaarluni nakkutilliiartortarnermi saniatigut utoqqarnik paaqqinniffit nalunaarfigeqqaarnagit aamma nakkutilliiartorfigisinnaavai.

§ 66. § 65 malillugu ingerlatsinermut sammititamik nakkutillineq ima ingerlanneqassaaq, nakkutillineq assigiiaartumik, ataqatigiissillugu aaqqissuussaasumik uppersaaserluakkamillu utoqqarnik paaqqinniffup kiffartuussissutaanik inissatigullu atugassarititaanik, kiisalu utoqqarnik paaqqinniffup suliaassanik suliarinnittarnera pillugu nalilersuinissamut tunngavissiissalluni.

Imm. 2. Inunnit suliamut tunngassuteqartut ataqatigiinnissaannik paasinnissinnaanissamut tunngavissaqartunit, tamannalu tunngavigalugu utoqqarnik paaqqinniffup unammillernartoqartitaanik ineriartornissamullu periarfissaanik nalunaaruteqarsinnaasunit nakkutillineq ingerlanneqassaaq.

Imm. 3. Nakkutilliinermi kommunalbestyrelsip nakkutilliinermiut atatillugu oqaloqatiginninnermigut utoqqarnik paaqqinniffimmi aqutsisut, sulisut inuillu najugaqartut peqataatissavai. Angajoqqaatut sinniisoqartoqarpas, angajoqqaatut sinniisut nakkutilliinermi peqataatinneqarsinnaapput.

Imm. 4. Siusinnerusukkut nakkutilliinermiut nalunaarusiaasimasuni oqaaseqaatit inassuteqaatillu aaqqissuussaasumik malitseqartinneqartarnissaat kommunalbestyrelsip nakkutilliinermut atatillugu qulakkiissavaa.

§ 67. § 65 malillugu ingerlatsinermut sammititamik nakkutillineq sammisanik makkuninnga imaqaassaaq:

- 1) Najugaqartut piginnaasatik naapertorlugit nammineq periarfissaqarfimminnik atorluaasinnaanissaat tamatumuunakkullu sapinngisaq tamaat nammineersinnaanissaat.
- 2) Najugaqartut sammisassaqaarnissamut periarfissaat.
- 3) Utoqqarnik paaqqinniffup sullinniagai, matumani utoqqarnik paaqqinniffup sullinniakkaminut neqeroorutigisaata imarisai, kiisalu najugaqartut nammineq inuunerminnut sunniuteqaqataanerat ilanngullugit.
- 4) Utoqqarnik paaqqinniffimmi periaatsit angusallu.
- 5) Utoqqarnik paaqqinniffimmi aaqqissuussaaneq aqutsinerlu.
- 6) Utoqqarnik paaqqinniffimmi sulisoqarnikkut piginnaasat.
- 7) Utoqqarnik paaqqinniffimmi illutatigut sinaakkutissat, matumani sullinniakkat pisariaqartitaannut aamma utoqqarnik paaqqinniffup periaasiinut ikorfartuinersut ilanngullugit.

Imm. 2. Sammineqartut tamarmik aalajangiinermi tunngaviit naleqquttut atorlugit itisilernerneqassapput, taakkulu katillugit utoqqarnik paaqqinniffik pillugu ataatsimut isiginnittumik ersersitsissapput.

§ 68. § 65 malillugu ingerlatsinermut sammititamik kommunalbestyrelsip nakkutilliinissaanut paasissutissat pisariaqartinneqartut, qinnuigineqarneq malillugu utoqqarnik paaqqinniffimmit kommunalbestyrelsimut tunniunneqassapput.

Imm. 2. Utoqqarnut paaqqinniffimmit paasissutissanik kommunalbestyrelsimut ingerlatitseqqinneq, ingerlatitseqqinneq nakkutilliinissamut pisariaqartuut isigineqarpas, najugaqartut imaluunniit taakku angajoqqaatut sinniisoqarsimagunik angajoqqaatut sinniisui akuersiteqqaarnagit pisinnaavoq.

§ 69. § 65 malillugu kommunalbestyrelse ingerlatsinermut sammititamik nakkutilliinermi atillugu utoqqarnik paaqqinniffimmi pissutsinik ernumanartunik maluginiagarpat, najugaqartut pissutsinik ernumanartunik sunnerneqarsinnaappata, kommunalbestyrelsimut inissiisusimasumut kommunalbestyrelse nalunaaruteqassaaq.

Nakkutilliinermi nalunaarusiaq

§ 70. § 65 malillugu ingerlatsinermut sammititamik nakkutilliinerit tamaasa nakkutilliinermi nalunaarusiamik kommunalbestyrelse suliaqartassaaq.

Imm. 2. Nakkutilliinermi nalunaarusiami paasissutissat tulluuttut takuneqarsinnaassapput:

- 1) Ulloq nakkutilliiffusoq.
- 2) Kina nakkutilliinermik ingerlatsisimanersoq.
- 3) Nakkutilliineq nalunaaqqaarluni nalunaaqqaarniluunniit ingerlaneqarsimanersoq.
- 4) Nakkutilliisoqartinnagu paasissutissat suut kommunalbestyrelsip pissarsiariniarsimanerai.
- 5) Kommunalestyrelsip nakkutilliinermi atillugu kikkut oqaloqateqatigisimanerai.
- 6) Atorfinnut akuerisaasunut naleqqiullugu utoqqarnik paaqqinniffimmi najugaqartut amerlassusaat aamma najugaqartut tapersorneqarnissamik pisariaqartitaat.
- 7) Ukiumi kingullermi pissaanermik atuinerit qassiusimanersut.
- 8) Nakkutilliinermi isiginiakkat.
- 9) Najugaqartut pisariaqartitaannik utoqqarnik paaqqinniffup nalilersorneqarnera.
- 10) Nakkutilliinerup malitsigisaanik qisuariartoqarsimappat qisuariaatit, matumani kommunalestyrelsimut imaluunniit kommunalestyrelsinut inissiisimasunut paasissutissanik ingerlatitseqqinnerit ilanngullugit.

Imm. 3. Nakkutilliinermi nalunaarusiaq tusarniummut akissuteqarnissamut ullunik 14-inik piffissalerlugu utoqqarnik paaqqinniffimmut tusarniaassutigineqassaaq. Inaarutaasumik nakkutilliinermi nalunaarusiap assileneqarnera utoqqarnik paaqqinniffimmut nassiunneqassaaq.

§ 71. § 70 malillugu kommunalestyrelsip nakkutilliinermi nalunaarusiamut ilanngullugit taassavai:

- 1) paasineqarsimasut paasissutissiissutaasimasullu pillugit oqaaseqaatit, aamma
- 2) pissutsit iluarsineqartariaqartut iliuuseqarfigineqartariaqartullu pillugit innersuussutit.

Imm. 2. Imm. 1 malillugu oqaaseqaatit innersuussutilluunniit utoqqarnik paaqqinniffup oqaloqatigineqareerneratigut suliarineqartassapput, aamma pissutsit aalajangersimasut oqaaseqaateqarnermut imaluunniit innersuussuteqarnermut tunngaviusut qanoq pitsaanerulersinnaanerannut imaluunniit aaqqiiffigineqarsinnaanerannut ilitsersuummik imaqassallutik.

Kapitali 10

Naammagittaalliuuteqarsinnaaneq

§ 72. Nalunaarut manna malillugu kommunalestyrelsip aalajangiineri Isumaginnittoqarfiup aqunneqarnera aqqissugaaneralu pillugit Inatsisartut peqqussutaat malillugu Isumaginninnermi Naammagittaalliuuteqartarfiimmut naammagittaalliuutigineqarsinnaapput.

Imm. 2. Nalunaarut manna malillugu Nakkutilliinermik ingerlatsiviup aalajangiineri aqutsinermi

oqartussaasunut allanut naammagittaalliuutigineqarsinnaanngillat.

Imm. 3. Nalunaarut manna malillugu aalajangiinernut, meeqqat suliat imminnut tunngassuteqartut pillugit naammagittaalliuuteqarnissaminut pisinnaatitaapput.

Kapitali 11

Atortuulerfia

§ 73. Nalunaarut ulloq 1. oktobari 2021-mi atuutilissaaq.

Imm. 2. Peqatigisaanik lsumaginninnermi suliaasaqarfimmi nakkutilliisarneq pillugu Namminersorlutik Oqartussat nalunaarutaat nr. 22, 24. juni 2020-imeersoq atorunnaarsinneqassaaq.

Namminersorlutik Oqartussat, ulloq 31. aggusti 2021

Mimi Karlsen

Meeqqanut, Inuusuttunut, Ilaqutariinnut Naalakkersuisoq

/ Julie Præst Wilche

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

